

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԵՎ ՏՆՏԵՍԱԿԱՆ
ՄՐՑԱԿՑՈՒԹՅՈՒՆԸ ԿԱՐԳԱՎՈՐՈՂ ՊԵՏԱԿԱՆ ՀԱՆՁՆԱԺՈՂՎԻ**

Ծ Ր Ա Գ Ի Ր

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԵՎ
ՏՆՏԵՍԱԿԱՆ ՄՐՑԱԿՑՈՒԹՅՈՒՆԸ ԿԱՐԳԱՎՈՐՈՂ ՊԵՏԱԿԱՆ ՀԱՆՁՆԱԺՈՂՎԻ
2014 ԹՎԱԿԱՆԻ ՏԱՐԵԿԱՆ ԳՈՐԾՈՒՆԵՈՒԹՅԱՆ**

Բ Ո Վ Ա Ն Դ Ա Կ ՈՒ Թ Յ ՈՒ Ն

Նախաբան	3
1. Կարգավորվող ոլորտների հիմնախնդիրներ.	4
2. Իրավական բարեփոխումներ.	4
3. Հեռահաղորդակցություն (այդ թվում՝ հեռուստատեսություն և ռադիո).	5
4. Տնտեսական մրցակցության պաշտպանություն	6
5. Լիցենզավորում և սակագնային քաղաքականություն	8
6. Հասարակայնության հետ կապեր	10
7. Պետական կառավարման մարմինների հետ համագործակցություն	10
8. Միջպետական համագործակցություն.	11

Նախաբան

Լեռնային Ղարաբաղի Հանրապետության հանրային ծառայությունները և տնտեսական մրցակցությունը կարգավորող պետական հանձնաժողովի (այսուհետ նաև՝ Հանձնաժողով) 2014 թվականի տարեկան գործունեության ծրագիրը կազմվել է Լեռնային Ղարաբաղի Հանրապետության օրենսդրության դրույթներին համապատասխան և պարունակում է միջոցառումների հայեցակարգ՝ կարգավորվող ոլորտի զարգացմանը նպաստող գերակա ուղղություններով: Հանձնաժողովի առաջնահերթ խնդիրներից է հանդիսանում օրենսդրական դաշտի շարունակական կատարելագործումը՝ Ելնելով սպառողների և կարգավորվող անձանց իրավունքների պաշտպանության, նրանց շահերի հավասարակշռման, մրցակցային միջավայրի զարգացման համար պայմանների ստեղծման, կարգավորվող ենթակառուցվածքներում արդյունավետ ներդրումների խրախուսման և կարգավորման դաշտի թափանցիկության ապահովման առաջնահերթություններից:

Հանձնաժողովի 2014 թվականի տարեկան գործունեության ծրագիրը ապահովում է 2007-2013 թվականների տարեկան գործունեության ծրագրերի շարունակականությունը:

Լեռնային Ղարաբաղի Հանրապետությունում հանրային ծառայությունների և տնտեսական մրցակցության կարգավորման քաղաքականությունը ծրագրավորվել է հաշվի առնելով երկրի տնտեսության դինամիկ զարգացման հիմնական ուղղությունները:

Հանձնաժողովը հիմնվելով Լեռնային Ղարաբաղի Հանրապետության տնտեսության, կարգավորվող բնագավառների իրավիճակի վերլուծության և նախորդ տարիների ընթացքում ձեռք բերած փորձին, իրականացնում է համալիր միջոցառումներ, որոնք ուղղված են երկրի տնտեսության զարգացմանը, բնակչությանը մատուցվող ծառայությունների բարելավման ու մրցակցային բարենպաստ միջավայրի ձևավորմանը:

Ծրագրի ուղղություններում ներառվել են նաև Հայաստանի Հանրապետության համապատասխան հանձնաժողովների հետ իրականացված քննարկումների արդյունքում նրանց կողմից ներկայացված առաջարկներն ու համագործակցության համաձայնագրերով ամրագրված ուղղությունները:

1. Կարգավորվող ոլորտների հիմնախնդիրներ

Լեռնային Ղարաբաղի Հանրապետության հանրային ծառայությունները և տնտեսական մրցակցությունը կարգավորող պետական հանձնաժողովը, իրականացնելով էներգետիկայի, հեռահաղորդակցության, տնտեսական մրցակցության պաշտպանության, փոստային կապի, տրանսպորտային միջոցների պարտադիր տեխնիկական զննության անցկացման (սակագների սահմանման և վերանայման մասով) բնագավառների ու ջրային համակարգի կարգավորումը, նպատակ ունի իր իրավունքների և պարտականությունների իրականացմամբ հավասարակշռել սպառողների ու հանրային ծառայությունների և տնտեսական մրցակցության ոլորտում կարգավորվող գործունեություն իրականացնող անձանց շահերը, կարգավորվող անձանց համար ստեղծել գործունեության միատեսակ պայմաններ, նպաստել մրցակցային շուկաների ձևավորմանն ու զարգացմանը, կարգավորվող դաշտի թափանցիկության ապահովմանն ու խթանել ռեսուրսների արդյունավետ օգտագործումը:

2. Իրավական բարեփոխումներ

Հանձնաժողովի կարևորագույն գործառնություններից է կարգավորվող ոլորտների իրավական դաշտի շարունակական կատարելագործումը՝ ելնելով սպառողների և կարգավորվող անձանց իրավունքների պաշտպանության ու շահերի հավասարակշռման, մրցակցային միջավայրի զարգացման համար անհրաժեշտ պայմանների ստեղծման, կարգավորվող ենթակառուցվածքներում արդյունավետ ներդրումների խրախուսման և կարգավորման դաշտի թափանցիկության ապահովման առաջնահերթություններից:

2014 թվականին կիրականացվեն էներգետիկայի և ջրային համակարգերի ոլորտների կարգավորման իրավական դաշտի կատարելագործմանն ուղղված աշխատանքները:

Կարգավորվող ընկերությունների ներդրումային ծրագրերը հանձնաժողովի հետ համաձայնեցնելու գործընթացի պարզեցման և հստակեցման նպատակով մշակվելու է էներգետիկայի բնագավառի կարգավորվող անձանց կողմից կատարված ներդրումների հաշվետվության ներկայացման կարգը և միաժամանակ լրացումներ ու փոփոխություններ են կատարվելու ներդրումային ծրագրերի համաձայնեցման կարգում, որոնք հնարավորություն կտան վերահսկել ներդրումների արդյունավետությունը՝ դրանք

նպատակաուղղելով բնագավառներում նորարարական, ավելի էներգախնայող և արդյունավետ տեխնոլոգիաների կիրառմանը, սպառողներին մատուցվող ծառայությունների որակի բարձրացմանը և ենթակառուցվածքների արդիականացմանը:

Խմելու ջուր մատակարարող ընկերությունների կողմից սպառողներին մատուցվող ծառայությունների որակի ապահովման համար կմշակվի լիցենզավորված անձանց կողմից կենցաղային կարիքների համար խմելու ջրի մատակարարմանը ներկայացվող սպասարկման որակի նվազագույն պահանջները:

3. Հեռահաղորդակցություն (այդ թվում՝ հեռուստատեսություն և ռադիո)

Հեռահաղորդակցության, այդ թվում՝ հեռուստատեսության և ռադիոյի բնագավառն իր բազմաբնույթ ուղղություններով և խնդիրներով համարվում է Հանձնաժողովի գործունեության գերակա ուղղություններից: Կշարունակվեն սկսված բարեփոխումներն այս բնագավառում, մշտական ուշադրության կենտրոնում պահելով բնակչությանը մտահոգող խնդիրները, և համապատասխան աշխատանքներ կտարվեն կարգավորվողների հետ:

Հանձնաժողովը նախատեսում է 2014 թվականի ընթացքում «Էլեկտրոնային հաղորդակցության մասին», «Հեռուստատեսության և ռադիոյի մասին», «Փոստային կապի մասին» Լեռնային Ղարաբաղի Հանրապետության օրենքներով իրեն վերապահված իրավասությունների շրջանակում՝ ուշադրության կենտրոնում պահելով բնակչությանը և կարգավորվողներին մտահոգող խնդիրները, ոլորտի կարգավորումը կիրականացնի հետևյալ ուղղություններով.

- ֆիքսված և բջջային կապի օպերատորի կողմից մատուցվող ծառայությունների ցանկը ընդլայնելու, բջջային կապի բաժանորդների համար նոր սակագնային պլանների մշակման և սակագների կարգավորման կապակցությամբ միջոցառումների իրականացում,
- լիցենզիաների և թույլտվությունների պայմանների, ինչպես նաև Հանձնաժողովի կողմից հաստատված իրավական ակտերի պահանջների կատարման ընթացքին հետևելու նպատակով պարբերաբար ուսումնասիրությունների իրականացում էլեկտրոնային հաղորդակցության, այդ թվում՝ հեռուստատեսության և ռադիոյի բնագավառի լիցենզավորված ընկերություններում,
- հանձնաժողովին հատկացված ռադիոհաճախականությունների առևտրային (կոմերցիոն) տիրույթի օգտագործման պլանավորում, համակարգում և արդյունավետ օգտագործում,

- Լեռնային Ղարաբաղի Հանրապետության տարածքում անօրեն ռադիոհաճախականություններ օգտագործող բոլոր անձանց հայտնաբերելու և օրինական դաշտ ներգրավելու կապակցությամբ աշխատանքների իրականացում՝ բնագավառի իրավասու մարմինների հետ համատեղ,

- Էլեկտրոնային հաղորդակցության, հեռուստատեսության և ռադիոյի, փոստային կապի, պարտադիր տեխնիկական զննության բնագավառների կարգավորվող ընկերությունների կողմից ներկայացվող ֆինանսական և տեխնիկատնտեսական հաշվետվությունների վերլուծության իրականացում, ինչպես նաև համապատասխան հայտերի ներկայացման դեպքերում՝ սակագների սահմանում և վերանայում,

- հեռուստառադիոհաղորդումների եթերային հեռարձակման լիցենզավորման մրցույթների հայտարարում և կազմակերպում՝ ըստ անհրաժեշտության,

- հեռահաղորդակցության ծառայություններից օգտվող բաժանորդների իրավունքների պաշտպանություն:

4. Տնտեսական մրցակցության պաշտպանություն

Տնտեսական մրցակցության պաշտպանության ոլորտի ծրագիրը նպատակաուղղված է պաշտպանել և խրախուսել ազատ տնտեսական մրցակցությունը, ապահովել բարեխիղճ մրցակցության համար անհրաժեշտ միջավայր, նպաստել ձեռնարկատիրության զարգացմանը և սպառողների շահերի պաշտպանությանը Լեռնային Ղարաբաղի Հանրապետությունում:

2014 թվականին տնտեսական մրցակցության պաշտպանության ոլորտում կիրականացվեն աշխատանքներ հետևյալ գերակա ուղղություններով՝

- **Անբարեխիղճ մրցակցության վերահսկողություն:** Հանձնաժողովը շաբաթական դիտանցումների, դիմում բողոքների, թեժ գծի, մամուլի և այլ հրապարակումների միջոցով 2014 թվականին հետևելու և վերահսկողություն է իրականացնելու տնտեսավարող սուբյեկտների կամ նրանց գործունեության վերաբերյալ շփոթության առաջացման, վարկաբեկման, հասարակության մոլորեցման, տնտեսավարող սուբյեկտների համբավի, վարկարժեքի վնասման և այլ անբարեխիղճ մրցակցության դեպքերի նկատմամբ:

- **Ապրանքային շուկաների ուսումնասիրություններ:** Առաջնահերթություն տալով առաջին անհրաժեշտության ապրանքային շուկաներում իրականացվող ուսումնասիրություններին, որոնց արդյունքում պարզվում են տվյալ շուկաներում

սուբյեկտների քանակը, նրանց մասնաբաժինը շուկայում, կենտրոնացվածության աստիճանը, գերիշխող դիրք ունեցող սուբյեկտների առկայությունը Հանձնաժողովը չարունակելու է աշխատանքներ իրականացնել ապրանքային շուկաներում չարաշահումների հայտնաբերման ուղղությամբ:

2014 թվականին Հանձնաժողովը ուսումնասիրություններ է նախատեսում ավտոմոբիլային խմիչքների և հյութերի շրջանառության ոլորտներում:

- ***Գերիշխող դիրքի չարաշահման բացահայտմանն ուղղված միջոցառումներ:***

Հանձնաժողովը՝ ուղղված գերիշխող դիրքի չարաշահման դեպքերի բացահայտմանը կիրականացնի տարբեր ապրանքային շուկաներում ուսումնասիրություններ և դիտանցումներ: Պարենային և ոչ պարենային շուկաների ուսումնասիրության նպատակով նախատեսվում է շաբաթական դիտանցումներ իրականացնել Լեռնային Ղարաբաղի Հանրապետության և առանձնապես Ստեփանակերտ քաղաքի առևտրային ցանց հանդիսացող խանութներում և սուպերմարկետներում:

- ***Հակամրցակցային համաձայնությունների կանխարգելում:***

Հատուկ ուշադրություն կդարձվի տնտեսավարող սուբյեկտների միջև հակամրցակցային համաձայնությունների հայտնաբերմանը: Հակամրցակցային համաձայնությունների հայտնաբերման, կանխարգելման, սահմանափակման ու արգելման նպատակով կիրականացվեն ապրանքային շուկաներում գործող գների ուսումնասիրություններ, ինչպես նաև տնտեսավարող սուբյեկտների շուկա մուտք գործելու խոչընդոտների հայտնաբերմանն ու վերացմանն ուղղված միջոցառումներ: Հանձնաժողովի կողմից նախատեսվում է ուսումնասիրություններ իրականացնել նաև պետական գնումների ոլորտում՝ հատկապես կուսումնասիրվեն առողջապահության ոլորտում ձեռք բերվող դեղերի գների հիմնավորվածությունը և հակամրցակցային նշանների առկայությունը:

- ***Համակենտրոնացումների և պետական օժանդակությունների նկատմամբ վերահսկողություն:*** Համակենտրոնացումների նկատմամբ վերահսկողություն իրականացնելու նպատակով Հանձնաժողովի գործունեությունը կիրականացվի հետևյալ ուղղություններով.

- ձեռնարկատիրական գործունեության համակարգման նպատակով տնտեսավարող սուբյեկտների միավորման արդյունքում ստեղծվող կազմակերպությունների նկատմամբ վերահսկողության իրականացում,

- տարբեր ապրանքային շուկաներում համակենտրոնացումների բացահայտում և շուկայի վրա դրանց ազդեցության հետազոտում,

- գործողության մեջ դրված արգելված համակենտրոնացումների հայտնաբերում ու լուծարում:

Մրցակցային դաշտի ձևավորման տեսանկյունից խիստ կարևոր է պետական օժանդակության արդարացի տրամադրումը, քանի որ մի տնտեսավարողին ֆինանսապես աջակցելու դեպքում հնարավոր է, որ անհավասար պայմաններ ստեղծվեն նույն գործունեությամբ զբաղվող այլ սուբյեկտների համար: Պետական օժանդակության (օգնություններ, վարկեր, գրանտներ) տրամադրման **գործընթացի թափանցիկության ապահովման համար** հանձնաժողովի նախաձեռնությամբ կամ իրավական ակտն ընդունող կամ պայմանագիր ստորագրող մարմնի դիմումի հիման վրա կատարվելու է պետական մարմինների կողմից ընդունված իրավական ակտերի և ստորագրված պայմանագրերի փորձաքննություն:

- **Լեռնային Ղարաբաղի Հանրապետության շրջաններում մրցունակության զարգացմանն ուղղված միջոցառումներ:** Հանձնաժողովի կողմից շարունակաբար միջոցառումներ են իրականացվելու Լեռնային Ղարաբաղի Հանրապետության շրջաններում մրցունակության զարգացման, չհիմնավորված գների կիրառման և անբարեխիղճ մրցակցության դեպքերի կանխարգելման նպատակով: Ուսումնասիրվելու են Լեռնային Ղարաբաղի Հանրապետության շրջանների առևտրի կետերում գործող գները, անբարեխիղճ մրցակցության հնարավոր դրսևորումները, իսկ անհրաժեշտության դեպքում հարուցվելու է վարչական վարույթ:

5. Լիցենզավորում և սակագնային քաղաքականություն

Սակագնային քաղաքականության իրականացման բնագավառում Հանձնաժողովը հիմք կընդունի համաշխարհային պրակտիկայում ընդունված՝ անհրաժեշտ հասույթի, ողջամիտ շահույթի և ծախսերի հիմնավորվածության ապահովման սկզբունքները, ինչպես նաև սպառողների և կարգավորվող գործունեություն իրականացնող անձանց շահերի հավասարակշռումը՝ միաժամանակ հնարավորություն ընձեռելով իրականացնելու արդիականացման և հեռանկարային զարգացման ծրագրեր:

Ելնելով սղաճի և արտարժույթի փոխարժեքի փոփոխություններից, յուրաքանչյուր տարի՝ համաձայն Հանձնաժողովի կողմից ընդունված մեթոդիկայի, վերանայվում են վերականգնվող էներգետիկ ռեսուրսների օգտագործմամբ էլեկտրական էներգիա արտադրող կայաններից առաքվող էլեկտրական էներգիայի վաճառքի սակագները:

Կարգավորվող ընկերությունների ֆինանսական հաշվետվությունների և տեխնիկատնտեսական տեղեկատվությունների վերլուծության արդյունքները հիմք են հանդիսանում կարգավորմանը վերաբերվող հիմնավորված որոշումների ընդունման, սակագնի սահմանման ու վերանայման, ներդրումային ծրագրերի իրականացման

ընթացքի գնահատման և լիցենզիայի պայմանների վերահսկման համար, ինչպես նաև հնարավորություն են տալիս ձևավորել կարգավորվող ընկերությունների ֆինանսական և տեխնիկատնտեսական ցուցանիշների համապատասխան վիճակագրական բազա:

Հանձնաժողովն իր իրավասությունների շրջանակում կշարունակի **լիցենզավորման** գործընթացն և կիրականացնի լիցենզավորման պայմանների կատարման ուսումնասիրություններ: Առանձնապես ուշադրություն կդարձվի սպառողների և լիցենզավորված գործունեություն իրականացնող կազմակերպությունների միջև պայմանագրային պարտավորությունների կատարման ընթացքին, իրենց պարտականությունները ոչ պատշաճ կատարող ընկերությունների նկատմամբ կկիրառվեն պատասխանատվության միջոցներ:

Հանձնաժողովը մշտապես հետևում է կարգավորվող ընկերությունների կողմից լիցենզիաների պայմանների պահպանման և իրավական ակտերի պահանջների կատարման ընթացքին՝ ինչպես ընկերություններից պահանջվող հաշվետվությունների, այնպես և ընտրանքային կարգով տեղերում իրականացվող մոնիթորինգների միջոցով:

Կարգավորման կարևոր լծակներից է կարգավորվող ընկերությունների ներդրումային ծրագրերի համաձայնեցումը հանձնաժողովի հետ, ինչը հնարավորություն է տալիս վերահսկել ներդրումների արդյունավետությունը՝ դրանք նպատակաուղղելով բնագավառներում նորարարական և արդյունավետ տեխնոլոգիաների կիրառմամբ մատուցվող ծառայությունների որակի բարձրացմանը:

2014 թվականին շարունակվելու են նաև կարգավորվող ընկերությունների կողմից սպառողներին մատուցվող ծառայությունների որակի գնահատման չափանիշների կատարելագործման և վերահսկման աշխատանքները:

Շարունակական բնույթ են կրելու էլեկտրական էներգիա, գազ և խմելու ջուր մատակարարող ընկերությունների կողմից սպառողների սպասարկման որակի ցուցանիշների վերաբերյալ Հանձնաժողով ներկայացվող տեղեկատվության վերլուծության աշխատանքները: Պարբերաբար իրականացվելու են քննարկումներ մատակարարների հետ՝ սպառողների սպասարկման որակի ցուցանիշներին առնչվող տեղեկատվության հավաստիության բարձրացման, ինչպես նաև դրանց վերլուծության ընթացքում հայտնաբերված թերությունների և շեղումների վերացման վերաբերյալ:

Հանձնաժողովը իր գործունեության առաջնահերթություններից է համարում խմելու ջուր մատակարարող ընկերություններին ներկայացվող սպասարկման որակի նվազագույն պահանջների կատարելագործումը: Ծրագրային տարում Հանձնաժողովի հաստատմանն են ներկայացվելու սպառողների ջրամատակարարման տևողության փաստացի և

ծրագրային մեծությունները, ինչը հնարավորություն կտա վերլուծել առավել վատթար վիճակում գտնվող սպառողների ջրամատակարարումը:

Հիդրոէներգետիկայի բնագավառում կիրականացվեն ուսումնասիրություններ և վերլուծություններ ուղղված կարգավորման բարենպաստ պայմանների ստեղծմանը՝ միաժամանակ վերահսկելով տրամադրված լիցենզիայի պայմանների պատշաճ կատարումը:

6. Հասարակայնության հետ կապեր

Հանրության համար հետաքրքրություն ներկայացնող որոշումների մասին հաղորդագրությունները, Հանձնաժողովի գործունեությանն առնչվող պաշտոնական տեղեկատվությունը կիրառարակվի մամուլի, մարմնի պաշտոնական կայքի և այլ էլեկտրոնային լրատվամիջոցներով: Հանձնաժողովի անդամները և աշխատակազմի մասնագետները հասարակական հնչեղություն ունեցող որոշումների, հարցերի շուրջ էլեկտրոնային լրատվամիջոցներով և տպագիր մամուլով պարբերաբար հանդես կգան ճանաչողական բնույթի հաղորդումներով, պարզաբանումներով և հարցազրույցներով:

Հանձնաժողովը թափանցիկ և հրապարակային գործունեության ու զանգվածային լրատվամիջոցների հետ համագործակցության ճանապարհով կնպաստի իր գործունեության վերաբերյալ հանրության իրազեկության աստիճանի բարձրացմանը: Հանձնաժողովը պաշտոնական ինտերնետային կայքի, մամուլի, ֆեյսբուք (facebook.com) սոցիալական ցանցի և հեռուստատեսության միջոցով կժանուցի Հանձնաժողովի նիստերի և ընդունված որոշումների մասին: Կշարունակվեն նաև պարբերաբար քննարկումները հասարակական կազմակերպությունների, սպառողների և կարգավորվող ընկերությունների մասնակցությամբ:

7. Պետական կառավարման մարմինների հետ համագործակցություն

Հանձնաժողովը շարունակելու և ընդլայնելու է համագործակցությունը պետական կառավարման մարմինների հետ: Համագործակցությունն առավել կարևորվում է հավաստի տեղեկատվության ստացման, փորձի փոխանակման և տնտեսական մրցակցության քաղաքականության կիրարկման վերաբերյալ հասարակության և

պետական այլ մարմինների կողմից ընկալման տեսանկյունից: Կարևորվում է Հանձնաժողովի համագործակցությունը իշխանության բոլոր թևերի՝ օրենսդիր, գործադիր և դատական համակարգի կառույցների հետ: Մասնավորապես, մրցակցության համար անհրաժեշտ միջավայր ապահովելու և մրցակցության քաղաքականության կիրարկման արդյունավետությունը բարձրացնելու նպատակով Հանձնաժողովը կհամագործակցի Լեռնային Ղարաբաղի Հանրապետության ազգային վիճակագրության ծառայության, արդարադատության նախարարության, արտադրական ենթակառուցվածքների նախարարության, ֆինանսների և էկոնոմիկայի նախարարության, կառավարությանն առընթեր հարկային պետական ծառայության, ինչպես նաև շահագրգիռ պետական այլ մարմինների հետ:

8. Միջպետական համագործակցություն

Հանձնաժողովը ծրագրային տարում նախատեսում է շարունակել ակտիվ համագործակցությունը Հայաստանի Հանրապետության հանրային ծառայությունները կարգավորող, տնտեսական մրցակցության պաշտպանության պետական, հեռուստատեսության և ռադիոյի ազգային հանձնաժողովների հետ: Հայաստանի Հանրապետության համապատասխան Հանձնաժողովների հետ կստորագրվեն համագործակցության համաձայնագրեր և աշխատանքային ծրագրեր:

Համագործակցության ծրագրերի շրջանակներում 2014 թվականին Հանձնաժողովի մասնագետները կմասնակցեն միջազգային կազմակերպությունների կողմից կազմակերպվող սեմինարներին և միջոցառումներին: Կիրականացվի համապատասխան ոլորտների միջազգային փորձի ուսումնասիրություն և կքննարկվի նման փորձի տեղայնացման հնարավորությունները:

**Լեռնային Ղարաբաղի Հանրապետության
հանրային ծառայությունները և տնտեսական
մրցակցությունը կարգավորող պետական
հանձնաժողովի նախագահ՝**

Լ. Մնացականյան